

# 分手後，遇上你

作者: 凍奶茶

Powered by [紙言](#)

# 遇上你

「丫諾，覺唔覺我好白痴，竟然相信呢個世界有真愛！」我好無奈地係到大叫。

「丫k，女死女還在，下個更可愛，係到飲酒煲煙大叫大喊有咩用丫，不如快啲忘記佢，搵果個仲好啦。」丫諾好無奈咁答我。

無錯，又失戀，原因係咩？鬼知咩，當你以為係呢個女仔嫁啦，一定係同你過下半世既伴侶既時候，佢會無啦啦唔知因為咩原因而同你講分手，再唔係就話不如大家冷靜下，過一排再聯絡，結果當然係冇再聯絡啦，唔係因為我識左第二個，而係因為對方好快咁比第二個人追左。今次分手，就因為對方一句「就當我對你唔住啦，唔好再煩我。」個時我心諗，小x叭，姐係點，一句話對我唔住就想飛左我，你當我係咩？公仔？話要就要，話唔要就唔要，我當然係唔服氣，結果煩左佢一星期我先死心。分手後第八日，當時既我，心情慢慢回復起黎，但依然每日過住煙酒不離口既生活，呢日，我係np某間酒吧到，岩岩同丫諾飲完酒，準備埋單走既時候，酒吧內某個角落，傳出一陣陣既爭吵聲，原來係兩個男為左一個女而大打出手，我好好奇，到底係咩女仔咁大魅力，竟然會令到兩個男人願意為佢大打出手，我慢慢地望向果個女仔，一剎那，個心突然間跳得好快。

## 第一次接觸

原因無他，因為個女仔平凡得黎，卻帶有小小仙女下凡既感覺，係我認識既女仔之中，一係就好樣衰，一係就好平凡，一係就好靚，但呢個女仔竟然可以比到我咁既感覺，實在太奇妙了。可能個女仔注意到有人望住佢，佢慢慢咁望過黎，個一剎那，成個世界好似得番我同佢咁。

佢對我微笑，之後點一點頭就繼續勸果兩個為佢大打出手既男仔，我望向個兩個男仔，mk得黎，帶有啲啲小朋友既感覺。突然其中一個男仔，隨手拎起一個玻璃杯，就一野車左出去，而個女仔企就係佢地兩個既中間，我心諗「仆街，車中左點算丫！」好在個女仔閃得快，避得快，先冇中招，但另一個男就唔好彩，玻璃杯衝向佢既額頭，令佢額頭開左個花出黎，紅色既血，慢慢係佢額頭流出黎，同時佢帶住怒火衝過去，個女仔拉住佢，點知比佢一句「死開啦八婆，阻住曬。」之後一手就推開左，個女仔受唔住個衝擊，正當佢準備失去平均，要跌落地既時候，唔知係唔係因為佢吸引到我，定係因為保護欲作怪，我竟然不由自主咁行去扶住佢，當我觸碰到佢隻手，全身就似觸電咁，企定定，唔敢郁。當佢企番穩既時候，佢回頭同我講聲多謝，之後就離開左我既懷抱，同時令我感到幾失望，就好似你細個問人借部遊戲機玩，點知果個人要番屋企，連同遊戲機一齊帶走，當部機離開你隻手，你都會感覺到失望咁。

## 緣份？

自從果件事後，我再冇見過呢個女仔，而我就繼續我既生活，我既生活無他，起身、番學、放學、番到屋企就睇下小說，咁就過到一日。有人問我，咁既生活你唔覺得悶咩？但我好想問，係呢個咁逼既香港，如果想搵個靜既地方睇書，除左屋企，仲有邊到呢？

由於掛住睇小說，搞到成績差曬，被逼轉校既我，好無奈地由一間好既學校，轉去寶馬山上既學校。大家都知道寶馬山上有五間學校被稱為寶馬山五嶽，小弟不幸，轉入其中一間，同時因為咁，命運之輪都開始轉動。

入校第一日，就比人捉頭髮，唔係因為頭髮顏色問題丫，而係因為小弟個頭，受古惑仔中雞爺既影響，因而留左個一樣既頭髮，所以唔比人捉就奇啦。當我合理眼，狠下心剪左佢既時候，而再打番開隻眼之時，仙女竟然出現係我眼前，著住校服既佢，如同當時係酒吧見到果時一樣，都係咁吸引，當係行過我身邊既時候，佢竟然同我say

hi，原來佢仲記得我，我當時開心到都唔知講咩好，點知佢見我唔講野，以為認錯人，只係唔好意思咁講左句「sorry,我認錯人。」之後就行左去，正當佢要行番上樓既時候，我突然大聲咁講「你有認錯丫，係我丫，我叫Yk，可唔可以同你交個朋友丫？」

# 紅顏知己

佢呆左一呆，之後對住我露出一個微笑，然後用佢美妙既聲線答我「可以，我叫Jessica，得閒就搵我傾計啦，我4d班嫁。」因為咁，我地慢慢多左傾計，同時我都了解左佢好多野，原來佢十歲以經環遊世界過，但佢家庭唔係好有錢，只係因為有一個中意去旅行既老豆姐，所以十歲以經環遊世界過。

有一次因為屋企發生左事，我好唔開心，當時我想搵一個人傾計，我打開部手機，係咁多個聯絡人之中，考慮緊應該叫邊個黎陪我傾既時候，搵搵下手機竟然死左機，我心諗「Fuck，好死唔死，家陣先黎死，唔通連個天都想玩化我。」當我望下個聯絡人係邊個既時候，我真係笑左，因為果個就係Jessica。

當我拆左手機舊電出黎，重新裝番之後，我竟然好自然咁打去比Jessica，叫佢出黎陪我，佢知道左我屋企發生咩事後，二話不說就打的去東區醫院搵我。佢見到我既時候，我坐左係馬路旁邊，食住煙，係我前面，一地都係煙頭.....佢見到我咁，竟然唔係黎安慰我，而係一巴咁車埋黎，我個時望住佢，見到佢竟然係到喊。

當時我都呆左，唔知道應該講啲咩野，我只係企左起身，行到佢面前，打開我既懷抱，張佢摟實，而佢冇反抗。

## 眼淚只能為我流

我地就咁樣摟左十分鐘，之後大家就分開左，佢抹住眼淚咁問我「做咩事要食煙，你知唔知食煙對身體唔好嫁，你係唔係想食死佢先開心丫？」佢最後果句基本上可以話係用大叫咁講出黎，當時我真係唔識點反應好，只係識得一味講對唔住。

當我地冷靜落黎個時，佢先醒起原來佢問我點解黎左醫院，一問起，我心情又跟住灰落黎。之後我慢慢咁開口「我老豆做地盤你知嫁啦，雖然話接左場黎做，但係你明嫁啦，親力親為咁做，效率高啲嫁哇。平時我老豆都好注意安全，今日唔知做乜鬼事，竟然比人整親，而且一面血，我都唔知道會唔會有咩事嫁。」

講講下，我好自然咁拎起支煙黎食，佢見到我又想食煙，之後一手打落黎，我大叫「痛嫁屌，咁那大力」佢黑住面咁同我講「知痛你又食！」我呆左一呆，因為我都唔明兩者有咩分別。之後佢見到我呆左，以為我痛到傻左，之後竟然捉住我隻手，放係佢口前面吹氣，每吹完一次，就講一句「痛痛飛走。」

見到佢咁可愛，我果刻真係忍唔住想錫落去，最後當然定力夠好，所以冇錫到落去。突然間諗起佢岩岩喊，之後唔知點解，我竟然用好溫柔既語氣同佢講「以後，你既眼淚只准對住我一個人流，知唔知道？」

## 愛上了嗎？

「哼哼，點解先，fd底就唔比我喊丫？定係我喊你會心痛丫？」Jessica用一個好串既表情問我。比佢咁問，心入邊有個莫名其妙既感覺，而且心臟果到仲跳得好快，快到就黎跳出個身體咁，我盡量令自己冷靜落黎，之後好串咁答番佢「食啦你，你喊我點會心痛丫，只不過見你喊得咁勁，我驚人地以為我蝦你姐。」

佢聽完之後，只係講左一個哦字，就冇再講野，佢一直陪我陪到十點，就番左屋企，而我就繼續留守醫院，等我老豆醒。凌晨三點個時，我老豆醒左，佢見我仲係到就叫左我番屋企，我好聽話咁打左個的番鰂魚涌，番到去以經四點幾，我好快咁沖左個涼，之後訓係床到，想訓又訓唔到，冇計，因為成個腦海不斷出現Jessica個樣，每當諗起自己冇啦啦摟住佢個情節，個心就跳得好鬼死快，快得離譜，突然醒起之前係酒吧都試過個心跳得咁鬼快，唔通自己真係愛上左佢？不過冇理由丫，又唔係同佢識左好耐，點會愛上佢丫，自己都笑自己白痴，之後打左自己一下，就繼續訓。

結果第二日，由於太夜訓，搞到遲曬大到，9點先番到學校，番到去又比人記名，放左學之後又要留堂一個鍾，諗起真係喊出黎。

放左學果時，準備起行去留堂個時，班中有個暴力女大叫我個名，我呆左一呆，望過去諗住問佢咩事，就見到Jessica企左係門口。

## 再次哭泣

「Yk，你一陣有咩做丫，一唔一齊去食野？」Jessica心情好似好好咁，連叫我個時把聲都甜過人，我好無奈咁答番佢「如果你願意等我一個鐘，我就陪你去啦」，Jessica諗都唔諗就答我「好丫，咁我去圖書館睇住書等你啦。」

一個鐘之後，我同Jessica有講有笑咁一齊行落山，我地行左去天后一間店都食香香雞，本來都唔想食煎炸野，因為怕爆倉，不過佢開心就得啦，局住咁食。食完之後諗住一齊行去坐2號屋企既時候，竟然撞番以前個女朋友，佢望一望我，再望下Jessica，之後竟然行黎同我打招呼，為左表示我家教好，我冇無視佢，我好有禮貌咁同佢say左個hi，佢問我「呢個你女朋友丫？幾靚女啫，不過可惜，你配唔起人囉我覺得，唔好阻住人地既幸福啦。」聽完之後我真係一肚火，正當我想發火個時，Jessica冇啦啦一下打左落前女朋友到，好大聲既一下「啪」，我都呆左。

雖然識Jessica唔係好耐，不過真係一次都味見過佢郁手，呢次竟然為我出手，即時令到我好鬼感動，眼淚差啲忍唔住噴埋出黎。條女比人車左一下，臉上出現一個紅紅既手掌印，之後隻眼開始轉紅，好似想喊咁，然後好串咁講左句「仆你個街，睇路丫八婆！」之後就走左去。

正當我想多謝Jessica為我出手既時候，佢竟然冇啦啦喊起上黎，之後我好緊張咁一邊幫佢抹眼淚，一邊問佢做咩事喊。



# 失眠的一夜

「做咩事喊丫你，比人串既係我破，我都味喊你就喊啦，喊包！」我一邊講笑咁安慰佢，一邊用右手既大拇指幫佢抹眠淚。佢喊住咁答我「我.....我.....我唔.....中意佢咁踏你，而且你.....邊有配唔起我丫.....嗚.....」

我聽完真係得啖笑，因為估唔到佢咁顧我既感受，而且仲冇睇我唔起。無錯，我有時會諗，自己會唔會有啲配唔起佢，因為話曬人地十歲就環遊世界過，而我咁大個，就連香港都有好多地方冇去過，因此有時我都會幾自卑。為左避免呢種自卑感，每當佢講起有關佢旅行既野，我都會選擇唔識都要扮矚識咁。

正當我諗緊野既時候，佢停止左喊，用一種好認真既表情問我「丫k，如果我同你講，我.....我鐘意你，你會唔會信我？」當佢問完之後，塊臉慢慢變紅，慢慢就紅到好似蘋果咁，聽完之後，我真係呆左，因為我估唔到佢會咁問，之後我仲開始幻想如果同佢一齊會點，但海腦一句彈左出黎「我覺得你真係配唔起人」，就因為呢個說，將我帶番去現實，可能我真係配唔起佢。

「我信你鐘意我，其實我都鐘意你，但背景既問題唔准許我同你一齊，對唔住，希望我地可以繼續做朋友。」

佢聽完之後，只係講左一句「對唔住，你當我冇問過。」之後就咁跑走左，我望住佢既背影，只係希望自己叫番說話唔會傷到佢。

番到屋企既時候，丫媽見我呆下呆下咁，佢就用佢好厚肉既手，一下拍落我背脊，但我依然呆下呆下，番到入房，不斷回想岩岩既情節，慢慢我就訓著，醒既時候，已經係晚黑十二點，我見咁夜，而且又唔肚餓，打算就咁接住訓落去，但呢個時候，whatsapp響左一聲，我睇完之後，成晚直至清晨我都冇訓過。

## 文字中的感情

「丫k，記唔記得你話過我既眼淚只准對你一個人流丫，你講得出呢句說話，證明你著緊我啦，既然你著緊我，點解今日要咁講野丫？係咪因為你覺得自己配我唔起丫？兩個人一齊，真係一定門當戶對先得咩？點解你好似古時啲人咁諗野？丫k，兩個人一齊，講既係個愛字，如果有呢個字，咁點解仲唔可以係埋一齊丫，點解仲要顧慮背景既問題，如其顧慮，倒不如你去爭取啦，以上既呢番說話，其實只係希望你嘗試放抵你顧慮既問題，而去同我一齊，因為我真係好中意你，好中意好中意，我唔想比自己去後悔，所以我先會講咁多野，希望你睇完，會好好考慮我講既野。」

點解要出難題比我，我明明就係一個懶人，只要問題有少少難，我就會選擇去逃避，因為我好怕麻煩，哪怕激嬲左條女，我都會懶得去諗應該點哄。

但係今次唔同，今次我唔想再逃避，因為我同Jessica一樣，我怕後悔，今日我原以為會失去，但以家個天重新比一次機會我，我諗我真係應該好好諗下。因為咁，我一晚冇訓，中間有打過比丫諾，問下佢意見，不過佢冇聽電話，可能係較左靜音掛。

一直到六點，我諗通左，我起身洗頭，再整個靚仔髮型就出左門口，面對自己既選擇。

# 我們在一起吧

出左門口，見時間仲早，打算係屋企附近既m記食番個早餐，再番學校搵Jessica，講出我既選擇比佢知，點知好衰唔衰，掛住諗一陣間既對白，搞到行過龍，遊魂既情況下去左Jessica屋企樓下。原本打算走嫁啦，因為味諗到應該點講，而且唔想咁快面對。可惜，想走既時候撞到個朋友，名為老鼠，人如其名，個樣成日鬼鬼鼠鼠咁，佢見到我，立即就鼠過打招呼，仲傾左陣計，佢見冇咩特別野傾，所以走先。正當我都諗住走既時候，後面有人大聲叫丫k。

頭都唔洗回就知佢係邊個啦，Jessica行埋黎，成個好奇寶寶咁既樣問我「點解你會係到既，想請我食早餐丫？」我心諗既然味諗到點講，請佢食早餐，等自己有啲時間諗下都唔錯啲，之後我好大方咁講「食咩你話事，錢唔係問題！」呢句一出，我自己都怕怕，因為講完先醒起，身上好似得五十蚊，希望佢唔會食咁盡啦，如果唔係中午我實餓瓜。

可能佢同我有心靈相通啦，佢選擇既係食m記。行去食既途中，佢冇啦啦問我「你仲咪答我，點解你會出現係到，係唔係因為我琴晚打既野？」望住佢對眼，我深呼吸，只係講左幾個字「Jessica，我地一齊啦！」

# 愛情合約

「無問題，由於我對你太了解，所以我知道你一定比我說服到而同我一齊，所以呢到有份愛情合約，你要簽左佢，我先會同你一齊，當然，你接受唔到，可以唔簽，唔簽既後果好明顯，就係fd都有得做！」

你媽的，味一齊就比你食住，一齊左咪骨都有埋，不過，對呢份愛情合約我真係好好奇，所以我都係拎左黎睇。

愛情合約:

1 男方每日都需要接女方回校和送女方回家

2 男方每當外出，都需要帶著女方

3 一星期要煮一次飯給女方吃

4 男方不得單獨和其他女性談話

5 男方每天都要說一聲我愛你給女方聽

6 假如簽了，理應照顧女方一生，因為女方將

一心一意跟隨男方，所以最好的回報就是照顧女方一生。

以上既條件，冇一條對我有利，但係我冇任何怒火，因為睇得出，佢係好怕受傷害，所以保障下自己好正常，況且我咁專一，有咩怕，簽咪簽，不過.....好似少左條，「既然你寫得出呢份，咁我加多條應該唔過份啦，係咪？」，「唔過份，你咪加囉，不過要合理」，「我只係要加一條，可以的話，九年後嫁比我。」

今日係作者女朋友生日，在這係到同女朋友講少少心底話，識到你真係好快樂，雖然一齊唔耐，不過你陪伴我經歷好多大大小小既事，係呢到同你講一聲，有你真好，愛你無悔，有悔也是相識太遲，生日快樂女人。

## 合約正式生效

「傻瓜，咪一齊就諗住要我嫁比你丫？傻左咩你！」Jessica笑住咁講，我靜左一靜，之後慢慢咁講出原因，「雖然同你相處唔耐，但同你一齊我真係好安心，無論咩時候，你都係扮演住開心果咁哄我開心，無論發生左咩事，你都企係我身邊陪住我，有你係我身邊真係好好，可以既話，我想將你永遠留係我身邊，所以我先想加咁既條件。」

Jessica聽完之後笑左一笑，「咁點解要係九年丫？」好奇寶寶又出黎，我語氣心腸咁講「大佬丫，家陣你先17炸，而我就19歲，點睇都唔似到左結婚年齡啦，況且結婚係一生得一次既事，最少對我黎講係咁，所以我希望可以比一個你畢生難忘既婚禮比你，因此錢好重要，冇錢又點比到畢生難忘既婚禮你呢。呢九年係用黎比我草老婆本嫁，等我可以風光咁娶你番去。」

我的媽啊，估唔到我竟然可以講得出咁感人既說話，我望一望Jessica，見佢已經眼紅紅咁，我大聲叫「你唔係又想喊哇？」，真係衰多口，一講完，Jessica就開始喊，仲要係收唔到聲果隻。雖然時間仲早，但街上好多人已經望住我地，我拖住Jessica走，一邊行，一邊幫佢抹眼淚。

到左m記門口，Jessica終於唔喊，而且仲講左句，令我開心左好耐既句子「合約正式生效」

## 初戀的感覺

話說同Jessica一齊左都有一個月到，但成日都有一種錯覺，就係初戀既感覺。每一個人既初戀都係好神聖，不容許他人踩踏。但你有冇試過，明明自己係一個拍左十幾次拖既人，但眼前既呢個人，比你既係一種好純潔既愛情。

就我所認識既人之中，一齊唔係為搞野，就係為錢，枉枉兩人走埋一齊都係帶有目的，有幾多人係為左一個愛字而走埋一齊？我同Jessica一齊咁耐，我竟然只係去到錫下咀仔既地步，唔敢再有下一步行為，因為我怕進行下一步，會破壞左我地純潔既愛。

有一次，Jessica行行下，冇啦啦問左一句，令我口啞啞既問題，「點解呢，你次次錫我既時候，明明好似想進行下一步咁，但結果反而停止左，唔敢繼續落去既？係唔係因為你個到性無能丫？」我的媽啊，唔搞你唔係應該仲好既咩？點解反而好似唔搞你就係錯既，我抹一抹汗，之後慢慢咁解答佢，「其實呢，我就唔係性無能，對住你，更加冇可能係性無能，我之所以唔繼續落去，係因為我尊重你，我唔想比你有一種性大過愛既感覺，更唔想你覺得我同你一齊係為左搞野，我同你一齊，真係出至個心，每當見到你，明明暴躁緊既我，都會變得好平靜，而且你身上比到我一種初戀既感覺。」

## 做事要狠，為你改變自己

話說今日係我同Jessica拍拖兩個月既大日子，我一早起身，出左去買蠟燭，之後番到屋企將蠟燭慢慢咁放係地下到，拼成JC兩個字，重點緊係唔響J

C要個字到啦，而係我將圓形既蠟燭，花左好耐時間去將佢變成心形既圖案。

蠟燭既野準備好之後，當然係準備整牛扒啦，為左今日既「心心大行動」，我琴晚就事先將牛扒切成心形。就係我岩岩整好曬啲野既時候，Jessica打黎，「好奇寶寶到左啦，有冇野要買上去丫？」自從同Jessica拍左拖之後，我就向np到租左一個平平地既單位，一房一廳一廁所一廚房，六千一個月，係呢個上唔到車既香港到算係咁啦，「得番一樣野要買，不過我一陣接埋你之後一齊去買啦。」「咁我係下邊等你啦。」，「知道啦好奇寶寶。」

當我拎齊野，搭完電梯出左大廈既時候，眼前呢一幕真係令我怒火衝天，當然唔係Jessica比仔圍啦，仲衰過呢樣，係我眼前出現左一班算熟悉既人，我前女朋友同佢地豬朋狗友。佢班豬朋狗友捉住Jessica左右手，Jessica係冇得反抗既情況下比我前女朋友係咁一巴一巴車埋去，每一巴打落Jessica塊面到，就好似一把把刀插係我個心到一樣痛。

呢一刻我只係有一種放虎歸山既感覺，我唔可以比呢種事再發生，我咩都唔理，只係一支箭咁衝過去。

# 不顧一切

由於真係好嬲，嬲既唔係點解好地地Jessica會比人打，係嬲自己如果早啲整好，落定黎就唔會發生呢啲事，愈諗愈嬲，就黎見到佢地班人，我咩都唔理，隨手拎起附近一個垃圾筒，就一下車埋去，仲差啲整親Jessica。

班人一見到我，就一個二個衝埋黎，係咁打我，人地多人成咁，我當然只能捱住比人打，正當我諗住轉身叫Jessica快啲走既時候，你媽的，見到一個滿面暗倉既肥仔諗住抽Jessica水。係男人見到呢種情景都會好嬲，當然我都唔例外，我唔顧佢地對我拳打腳踢，我就咁死頂行過去，一邊行，一邊諗，點解會變成咁，好嬲好嬲，我捉住個肥仔，一拳一拳咁打落佢塊面到，每一拳用盡我身上既力，正當我打到唔知第幾拳既時候，比人從後打左一下，之後只係感覺到頭濕濕，感覺到個頭好暈，隨後就訓抵左。

醒既時候，我發覺自己係一間四面都係白色牆既地方到，明明前一秒我仲係街，點解後一秒我會係一個咁既地方到既。正當我諗住睇真啲既時候，房門比人打開左，喊出黎，如果唔係有人打開門，我肯定以為呢到密室黎，我望下個門口，見到有個女仔企係到，隻眼紅曬，我心諗「咩事丫，一入黎就喊曬口咁，我識佢既咩？點解會有種特別既感覺？就好似好熟悉佢咁既？」



## 緣盡？

「請問你係邊位，你知唔知呢到係邊到黎？點解我會係到既？乜我唔係應該向街既咩.....  
.....」我一連串既問題，個女仔聽完第一句之後，就失曬控咁，捉住左我隻手，係咁搖我，之後不停咁講「對唔住，對唔住丫，都係我搞成你咁，你唔好忘記我丫，我係Jessica丫，你記唔記得丫.....嗚.....」

「Jessica？個名好熟，到底係邊個黎，點解呢個名令我個心跳得咁快，我同呢個女仔到底有咩到關係？」我不停咁問自己，但我真係唔記得，到底我發生左咩事？突然間，房門被人打開左，我見到我丫爸丫媽入左黎。我即刻問我丫媽「丫媽，呢條女邊個黎嫁，點解佢會係到既，係咪親戚黎嫁？」我見我丫媽呆左一呆，然後同老豆行埋黎，拍一拍個女仔，之後唉左一聲先答我「丫b，佢係你女朋友丫，你唔記得佢啦？你唔係話佢係你結婚對象黎既咩？」我心諗「咩事丫？搞咩一醒左會多左個結婚對象嫁！」

突然個女仔冇再喊，反而企左起身，之後紅住眼同我講「丫k，你因為為左保護我而受傷，你比人係後腦到爆樽，之後你就暈左，你訓左五日四夜，我就係到陪你咁耐，但你點可以忘記我，忘記我地所有既野！！」

# 失憶

就係呢個時候，醫生入左黎，佢見我醒左，當然幫我Check下啦，之後慢條斯理咁講「由於病人後腦受到攻擊，有機會造成失憶，經常上頭痛等情況，我建意佢留院觀察一星期到，再作評估。」我聽完當場向醫生說不，醫院啲藥水味咁難頂，我番屋企休息仲好啦，由於我既堅持，父母最終同意比我番屋企休養下。

走之前，我向住Jessica好認真咁講「雖然我唔記得發生左咩事，唔記得你係邊個，不過希望你相信我，既然我記得出你係我結婚對象咁既說話，就一定係真話，希望你比啲時間我去記番起一切，可唔可以？」Jessica又再次喊起上黎「可以丫可以丫。」我幫佢抹一抹眼淚，之後唔知點解好自然講左一句「你喊包黎嫁？哈哈.....」突然間，好似記得啲野，又好似唔記得咁，Jessica見我唔對路，就好緊張咁問我「你有冇事丫？」

「冇丫，我只係記得我以前應該有咁話過你，係唔係丫？」我好呆咁問，Jessica笑左一笑，「你何止話我係喊包，而且仲講左一句說話，就係.....」Jessica專登吊起我既好奇心，又唔講係咩事，之後我不斷煩佢，佢先肯話我知，「你話過，呢一生我只可以為你一個人流淚。」

## 回到當時上

「既然要記番同Jessica之間既野，不如去你地去第一次見面既地方啦。」就係呢個時候，我老媽子講左句咁既野，我聽完之後，心諗又係破，之後轉個頭就問Jessica，「係呢，我地第一次見面係邊嫁？」「我地第一次向酒吧見嫁，而且第一次見面，你就攞住人地！」，「死仔，估唔到你咁狼死呀吓，哈哈.....」，果然係我丫媽，就算係我受傷既時候都要串下我。

「今晚我就帶你去我地第一次見面既地方啦。」Jessica笑容滿面咁講，「好，今晚見。」我地就係醫院解散，晚上十點，Jessica打黎約我係Np既T字碼頭到等。十點半到，我就到左T字碼頭，而Jessica早我一步到左，佢見到我，就行埋黎，拖住我隻手，之後只係講左句，「行啦，我地去令你記起一切，希望今晚就可以令你恢復啦，如果唔係，我好驚有人會搶走.....你.....嗚.....」果然係喊包，講講下又喊，我攞住佢，之後抬起佢個頭，向佢個咀錫左一啖，之後望住佢講左句「傻瓜，我唔會走，就算記唔起以前既野，我都唔會離開你！」

Jessica滿面疑惑咁問我「其實你係唔係真係失憶嫁，如果唔係，點解會講呢啲說話？」「白痴，我昆你有咩著數，而且我醒個一刻，望到你個樣，我個心就莫名其妙咁跳得好快，我相信，我以經鐘意左你！」

## 回到當時下

「我相信你講既一切，而且無論點，我都會令你恢復。」Jessica好有決心咁講。「廢話小說，行啦女人。」我霸氣盡露咁講，Jessica好乖咁擣住我隻手，一齊行去一間名為傷心吧既地方。入到間吧，音樂當然要配合番吧既名啦，但估唔到入邊既人都咁配合，係間吧諗住搵個位坐下，點知發現好多女係咁喊緊，果然係傷心吧。我同Jessica搵左個角位，坐左係到，叫左杯威士忌，就係到打量下間吧，同時我發現，有班mk仔女係到望住我同Jessica，而且望既時候，仲同身邊既人有講有笑，呢個時候，其中一個mk仔走左過黎。我細細聲同Jessica講「小心，有個mk仔行緊埋黎，你識唔識佢？」Jessica望左一望，之後個樣好似撞鬼咁，我見咁既情況，我問下佢做咩事，之後佢先回一回神，好緊張要拖我走，我拉一拉佢，問佢到底發生咩事，佢喊住咁講「佢就係打到你入醫院果個人啦，快啲走啦，我好驚你再傷一次丫。」講完就立即拖住我走，我甩開佢隻手，之後好型咁講左句「有復不報非君子，佢傷到我，我就要廢左佢。」

當我係枱面拎起杯酒，行埋去既時候，身邊有個男既冇啦啦行下黎撞一撞我，之後講左句「死仔，睇路丫，望咩丫打到你見紅呀啦！」我有理佢，繼續行，行到個mk仔面前，我望住個果塊比長長既陰遮住既面，講左句，「就係你傷左我？」mk仔果然mk，講野都串啲，「吹？傷得你少？要唔要再入去訓下？」我笑左一笑，一隻杯車落佢個頭到，望住佢頭頂慢慢流血落黎，我個腦突然好似播電影咁，播緊我所失去既回憶，同時我都恢復。

## 傷人案？

比我打到見紅既人兄，訓左係地，不斷叫好痛好痛，而我比佢慘叫既聲音，挑起左心入邊隻惡魔，佢不斷叫，我就不斷踩佢，突然間，門口果到聽到有人叫「警察，咪郁。」

我停左手，企埋一邊，差佬行埋黎，見條mk暈左，好明顯比我打暈啦，我當場斷正，差佬話「唔洗講啦，人都打暈埋，跟我番警局啦。」我以一個不出我所料既態度去問佢「入左有冇機出番黎？」差佬以一個好串既眼神望住我講「驚就咪打到人咁啦，不過，佢唔告你就應該冇事既！」

「Y sir

·走之前可唔可以同女朋友打聲招呼先？」我好冷靜咁問Y sir，Y sir答左兩個字，要快。我行埋去Jessica到，正當我想講野既時候，Jessica一巴打埋黎，佢冇講咩，因為佢喊得好勁，我右邊面紅到好似比火燒，但我冇怪佢，我攬住左佢，係佢耳邊細細聲咁講「對唔住，唔好怪我好冇？我知我衝動，但我唔想係你眼中見到害怕呢兩隻字，因為萬大事有我Y k，天就算係跌落黎，我都會幫你頂住，因為我愛你，所以為你做盡一切任何事都冇所謂，原諒我既自私好冇？仲有，如果我真係因為咁要人去坐，答應我，搵果個，唔好等我，因為坐過既人，出番黎唔會比人睇得起，我唔想到時你因為我而比人睇唔起！」

## 坐48小時

“唔一定會入去坐既，不過呢，48就一定就唔甩。”丫sir聽到我地既對話，所以走黎加把口，Jessica聽完之後，用一種我從味係佢身上搵到既感覺黎同我講野，“總之無論點樣，我都唔會離開你，就算你點講都冇用，而且呢件事，我唔會話比你丫爸丫媽知住，我會同佢地講你係我到住兩日，有咩都等條友醒左再算。”我冇再講咩，只係唉左一聲，就跟住個差人番去。

去到差館，都係問下咩名丫，幾歲果啲，但當個丫sir問我咩事打人既時候，我將我本身比人打既事講曬出黎，跟住個丫sir講左句“醒啲啦，如果佢醒左要告你，你就用呢件事要脅佢啦，咁你咪可以冇囉”，我心諗，咩差佬黎，不過佢肯咁幫我，都算係咁啦。可惜，48由於走唔甩，我跟左個丫sir去倉房，話曬第一次坐監，話唔驚就假，不過如其驚呢樣，不如擔心下Jessica仲好。話就話佢表面冇咩野咁，但我比任何人都知道佢有幾唔開心，有幾擔心我，今次入黎坐，算唔算係比自己冷靜下，同時諗下如果冇事，應該點樣改變自己呢種性格，費事因為呢種性格，令Jessica再咁擔心我。

# 時間的流逝

由我入到黎呢間房，時間就好似停止左咁，但無可否認時間係唔會停止，腦海不斷浮現Jessica喊既時候既樣。可能係幻聽啦，耳仔仲不斷有Jessica喊既聲音傳入。由於身上既野比差人收曬，所以咁既情況持續左幾耐我都唔知道。

到最後我我忍無可忍，係咁用拳頭打道牆，呢招真係幾有用，慢慢耳仔再有Jessica喊既聲音。我冷靜落黎之後，訓左係床到，慢慢我就訓著左，而且仲發左個夢。夢中，我番左去我出事果一日，我安照我個日既安排，整牛排，整蠟燭，但今次既我，係快快手整完，所以早左落去，當然之後既事情都有發生到，而且仲可以Jessica過左一個美妙既晚黑。

呢一覺醒左，應該係第二日到掛，因為個天好光，我做左廿幾下掌上壓就坐左係地下，肚好餓。由於我食慣Jessica煮既野，因而我基本上好少食街既野同陌生人煮既野，只能希望時間過得快啲。我選擇訓係地到，訓醒再訓，好快就到左48小時。點解我會知道？因為去到47小時既時候，捉我既果位差人入黎搵我傾計，可能佢覺得我好可憐，所以黎到搵我，而且從中得知，原來成件事都係我前女友計劃，當我知道呢件事，我真係好後悔識到佢，如果可以早啲識到Jessica，咁之後既事就唔會發生。

。

# 一切結束

「拿，你今次lucky啦，人地就唔投訴你，不過醫藥費就要幫人比嫁啦，當然啦，知道你唔會服氣，我幫你同佢講左，如果比一半唔係問題，全數既話你就會將先前發生既事講曬出黎，結果佢話你比一半就得。」Y sir咬住支煙黎同我講，我諗左一諗，為左唔好煩，比就比啦，「ok，一半就一半，但你同佢講，我希望比完唔好再撞到佢，我唔想見到佢，今次肯比，係因為我唔想煩。」Y sir用一種早就估到既眼神望住我「好，我會幫你轉達。」

事情傾好曬，而且都夠48，我拎埋啲野，行出np個警局，正當我諗住打的番去既時候，突然有人從後攞住我，對方身上傳黎既氣味，呢世我都唔會忘記，我拍一拍呢對攞住我既手，但對方唔肯放手，我只好開口「Jessica，你咁樣攞住我，我會怕羞嫁，有咩都放開我先講啦，你再攞到咁實，我會呼吸唔到嫁。」「唔放，打死都唔再放，兩日前就因為放左手，搞到你係入邊受苦，對唔住丫，你原諒我啦好丫？」Jessica眼紅住咁講，「傻瓜，對咩唔住丫，錯又唔係你，係我自己衝動炸話，而且我係入邊都無受苦，因為捉我入去個Y sir知道成件事既來龍去脈，所以特別照顧我，而且我比一半醫藥費就夠啦，我答應你，我以後都唔會再衝動嫁啦，為左唔會再令你擔心。」



## 父母反對

原以為事情結束，一切會安好，我同Jessica會好好地一齊，誰不知，我入警局呢件事會比Jessica父母知道左，佢地既反應當然係唔希望自己個女同個咁既人一齊。就係琴日，Jessica既丫媽打黎約我天日去佢地屋企個會所到傾計，冇得我say no，所以我只好去。

下午一點，我著得靚靚仔仔咁去，以為Jessica父母只係話我幾句咁簡單，點知呢次既對話，就將我同Jessica既感情拉左落谷底。我去到會所，諗住搵下佢既父母係邊，正當我搵緊既時候，Jessica老豆出現左係我眼前，招一招手叫我過去。坐左係到之後，對話都正式開始。

「Yk，最近點？一切ok丫哇？」首先開聲既係Jessica既媽媽，「ok丫，食得好，訓得好，哈哈.....」，「我地開門見山，廢話少說，我地希望你離開Jessica！」Jessica老豆終於開門，「點解我要離開佢，我做錯咩野？我有對佢唔住咩？」我面帶怒氣咁講。Jessica老豆哼左一聲，「冇話你對佢唔住，但你覺唔覺你既出現，改變左佢好多野？仲有，你入警局果兩日，你又知唔知Jessica擔心你擔心到飯又唔食，學又唔番，而且仲暈低，送左入院，一醒就衝去警局守門口，你搞到佢咁，仲叫我地點放心將佢交比你？況且，你發生左一次咁既事，難保你唔會發生第二次。」

## 豪賭一次，許下承諾

「我承認，今次確實係我做錯，我唔應該咁衝動，但係，uncle你知唔知道，比我打傷既呢個人，係早排同樣將我打到入院，我做入只知一個道理，君子報，一報就要報到盡，我知道我咁既心態唔得，但呢樣野係天生。」我好冷靜咁講，冇比Jessica爸爸既說話影響到，「你係咪覺得自己咁講好型，無錯？」Jessica爸爸冷笑咁講，「我唔係覺得自己好型，講野無錯，但同樣我明白，我愛佢，如果我唔解釋，我將會失去佢。」Jessica爸爸聽完之後，只係問我「你話愛佢，咁我問你，咩係愛？答得出，我唔會阻止你地！」呢次係最後一次機會，我呼吸左一陣，飲左啖眼前既咖啡，望住Jessica既爸爸講「就我對愛呢個字既了解，愛一個人，係應該對佢坦誠，唔會背住佢搞三搞四，愛一個人，應該對佢比對自己更加好，愛一個人，應該事事以佢為先，無論做咩事都應該顧及左佢既感受先，如果真係愛佢，無論將來條路點難行，都應該捱落去，因為大丈夫，少少苦都忍唔到，點可以令愛你既人放心跟隨你。」一口氣講左咁多野，我都幾佩服自己。

希望我既說話，可以打動到uncle啦，uncle聽完大笑左幾聲，拍下我個頭，之後走左去，而aunties係手袋拎起個電話，而且畫面仲著緊，畫面顯示緊通話中幾隻字，而通話對象就係Jessica。

# 一場計謀

「點解aunties你會同Jessica通話緊既？咁岩岩既說話佢咪聽到囉。」我既真情說話竟然比Jessica聽到，正當我諗緊點算既時候，突然背後有個人輕聲細語咁講「聽到又點丫，乜有野我係唔知得既咩？」

呃，點解當事人會係到既，「哇，人嚇人，嚇死人丫，點解你會係到既？」「呢到係我屋企，點解我唔可以係到呢？仲有，我想聽你心入邊果句！」Jessica冇啦啦咁講，搞到我一頭霧水，乜我有野瞞佢咩？「咩心入邊果句？」，「點解你明明記番起所有野，但仲要打果個人，以前既你，根本唔會咁做！」Jessica好激動咁問，「其實由第一次見到你，你就好似天使咁，淨化左我個人，將我由惡魔既性格，打造番為凡人既性格，我驚我暴力既性格會嚇親你，所有我一直控制住自己。但係，早前發生既果件事令到我真係好嬲，我嬲到連要控制住自己都唔記得，而且我好嬲自己保護唔到你，保護唔到自己最愛既人，對唔住，你原諒我既衝動好唔好？」

「傻瓜，如果我要嬲你，就唔會安排今日既見面啦。」Jessica笑住咁拍我個頭，「咩話，你安排？乜唔係你父母要搵我傾計咩？」我好驚訝咁問，「一開始既係，但通話果到係我安排，我想知道你會唔會當住我父母講大話佢地。」

## 點解要試我？

「點解你要試我？乜我有必要去呃你既父母咩？你唔係唔知道，對住你，我從來都唔會講大話，唔係因為我唔識講，而係因為我唔想有野瞞你，兩個人一齊，如果連個信字都咁難建立，咁仲點一齊？」我好嬲咁質問佢。

Jessica愈聽愈無奈，因為佢估唔到一個試驗既結果會變成咁，佢愈諗愈嬲，最後竟然講左一句，「我地冷靜下啦，當你冷靜落黎，我再話你知成件事係點。」我由於怒火中燒，自然唔理咁多，「有咩就以家講！」Jessica聽完，只係唉左一聲，之後講左句，「遲下再講啦，我唔想同你嘈。」之後就走左去，正常黎講，我係應該阻止佢離開，但我冇咁做到，可能因為我太嬲，因為我唔中意人地唔信任我，但估唔到，今次既離別，令我地錯過好多野，而且仲比人從中介入。

自從果件事後，我地有7日冇見面，而且連一個電話或whatsapp都冇，今日，我終於忍唔住，我打左比Jessica，諗住問下佢做緊咩，之後再約佢出黎，點知，聽電話既係一個男，「喂？你邊位」，我呆左一呆，之後cut左線。

另一邊，Jessica岩岩係廁所出黎，之後個男既就話「表妹，岩岩有個叫Yk既人打比你，但冇講到野就cut左線。」Jessica聽完之後講左句，「死佬，終於肯搵我啦。」然後就拎起個電話打比我。

## 要結束了嗎？

手機再次響起，一幅笑得好甜既女仔相出現係手機既螢幕，無錯，係Jessica打黎，佢已經打左第五次黎，但我始終都係冇聽，原因無他，就係因為把男人聲。腦海不斷出現各種各樣既念頭，為左令電話唔再響，我熄左機，掉左落床，自己就訓係地下，一訓就三日三夜。

其間Jessica有上過黎，不過我冇開到門比佢，佢不斷禁鐘，我就選擇逃避，因為我唔知道點面對佢，我好驚佢一見到我，就係講分手，所以我唔見佢仲好。直至第十二日，我訓唔著，我打開youtube，咁岩見到劉嘉亮既你到底愛誰，我播出黎聽「一個人喝醉，好想找個人來陪，我們之間有太多的誤會，愛不能再沉睡，是可悲是摧毀，我不要再為誰掉眼淚。」

呢隻歌，勾起我同Jessica既回憶，唔通中間有咩誤會，而我因為心情唔好，所以亂諗，但另一方面，我又會覺得根本我冇諗錯，佢確實係同男仔一齊，可能以家陪佢身邊既男人，先至係佢既真愛。諗深一層，其實一切可能都係我自己造成，如果我唔衝動，唔打架，唔坐監，之後一切一切既事都唔會發生。但係以家，所有事都因為自己而改變左，到底我仲係唔係可以比到幸福佢，問題不斷係腦海浮現，點解因為一把聲，就發生左咁多事情。

# 狠下心

為左令到佢唔會再傷心，唔會再唔開心，我選擇放棄，我選擇比佢搵個更好既，確定呢個決定之後，我就將同Jessica有關係既野，全部放曬係書包到，之後就去沖涼訓教，準備第二日番學面對Jessica。

一如既往，番學之前，係學校附近既賽西湖食番支煙，食到一半，Jessica又打黎，既然我願意狠下心，我就應該面對佢，我選擇接聽，「喂，咩事？」，可能見我肯聽電話，Jessica異常既激動「咁多日死左去邊丫你，做乜唔聽我電話丫，點解要避我丫你，講丫死人頭。」我吸一啖煙，呼番出黎，令自己冷靜落黎，「你今日如果會番學既話，就中午上天台搵我，記住要食左野先，我費時你一陣胃痛，如果冇食就唔好黎搵我，知唔知？」，最後一次既關心，Jessica聽完立即講「得，咁中午學校見，拜拜。」

我掛左線之後，食完最後一啖煙就起程番學校。中午既時候，一落堂我就上左學校既天台等Jessica，一點半既時候，Jessica出現係天台既門口，而且手拎住我最鐘意食既咖喱牛腩飯，平時我一定即刻搶黎食，不過今日我冇咁做到，我只係想好好地咁望多佢幾眼，因為今日之後，都唔知道仲會唔會有機會見到Jessica。

## 最好的結果嗎？

Jessica一步一步行埋黎，而我不停咁震，因為我好想喊，因為我將會失去佢，但我要忍住，因為一切既一切都係為佢既幸福著想，所以我願意獨自接受傷感。Jessica行到我面前，佢好習慣咁錫左我一啖，我有避到，因為我想係失去前，留下一個美好既回憶。

Jessica見我有反應，以為我唔舒服，之後好緊張咁放隻手係我額頭到睇下我有冇燒，「冇發燒啲，你見邊到唔舒服㗎？」，從佢眼中可以睇得出佢對我既擔心，可惜一陣就唔屬於我，「我有事㗎，係呢，我.....我.....有啲野想同你講。」講完之後，我唔敢望住Jessica隻眼，「講啦咁，做咩隻眼好似賊咁，鬼鬼鼠鼠咁唔敢望我㗎？」

我深左一下呼吸，用自己最cool既一面望住佢，然後講出最令我後悔既謊言，「我想同你分手，我覺得自己同你唔夾，我同你根本係兩個世界既人，勉強一齊對你唔會有好處，希望你會搵到一個比我更好，對唔住。」我講完最後果句，我真係好想喊，但由於佢係到，因此我只可以忍。

我原以為Jessica聽完會不停咁喊，但估唔到佢冇反應，我同佢就咁企左係到，過左一陣，Jessica紅住眼講「你望住我，將你頭先既說話講多一次，你夠唔夠膽？」

## 這樣子對嗎？

「你識我咁耐，你應該明白，冇乜我係唔夠膽既？冇丫哇，所以我點會唔夠膽，我同你講，你我根本就連開始都唔應該開始，連計都唔應該傾，咁我地就唔會熟，就唔會一齊。」我依然好cool咁講野，但Jessica就係咁震，而且眼淚不停咁流，我好想為佢抹眼淚，好想吻走佢面上既淚珠，但我只可以狠心咁比佢慢慢喊，為左令佢死心，我決定踏多幾腳，「你知唔知我最憎女仔喊，你知唔知道你一喊，搞到我個人幾燥，而且有時你係街到喊，街上啲人係咁望住我，比我感覺好醜丫！」

「我應承你我改啦，我唔再喊啦，你唔好離開我啦好冇丫，我唔想冇左你丫，嗚.....」Jessica一講完就喊到收唔到聲，其實聽完我真係有一刻心軟，但我只能繼續狠心落去，一切都只係為佢好，「唔洗改，你只要搵個比我更好既就得，好啦，唔再講，我走先，我一陣就會去搞退學既事，你以後都唔會見到我呢個.....人渣，再見。」講完我就轉身走左，眼淚都因此咁而不斷咁流，我唔會希望你原諒我既無情，但希望你日後會帶眼識人，因為我驚你會比人呃，從此我會默默做你既守護天使，守護你日後既幸福。我方走遠到，只係企左係一個Jessica見唔到我既地方，默默咁睇住Jessica喊。



## 分開的第七天

今日係我地分開既第七日，同樣都係我離開學校既第七日，我冇再讀書，正正式式成為雙失青年，失戀又失學，當然，呢一切都係我自己攞黎。自從失戀後，我多左一個習慣。

我每日六點半就會係Jessica屋企對面既7仔到等Jessica落黎，當然佢一直都唔知道我既存在，我只係遠遠咁望住佢，頭幾日Jessica都係日日紅住眼出大廈，紅住眼番屋企咁樣，但自後第五日，我發現Jessica成日滿口笑容，而且仲成日拎住個電話笑個唔停，唔通佢已經比人哄係開心？哄佢既係男定女呢？唔知道又發展到咩地步呢？如期亂諗，不如自己尋找答案，今日Jessica放左學冇直接番到屋企，而係落左去銅鑼灣，我感到好奇，打去比我學校原先既朋友，了解下Jessica既近況，「丫仁，Jessica最近有冇異常情況或者有冇男仔追佢咁？」，「k哥，上次你叫我幫手之後，開頭見佢仲成日一面唔開心既樣，而且仲唔講野咁，無論咩人同佢講野都冇反應，但最近，我發覺中四同佢同班有條淫蟲，成日係Jessica身邊轉黎轉去，而且仲時不時拖住Jessica隻手。」

我愈聽愈嬲，如果Jessica係識個好啲既人都話，但識個咁既人，絕對唔得，我決定要插手，「比條友既一切資料我。」

## 如果你敢亂黎

「全名李家誠，花名二世祖，同Yk你一樣住鰂魚涌，而且仲係你屋企附近添，聽講為人好差，成日周圍識女仔，而且又抽女仔水，好多男既都好憎佢，but人地勝左家底好，而且又好鬼闊佬，成日請全班去玩，所以大家都睇在錢份上，冇出手教訓，但睇黎k哥插得手，一定唔簡單，所以麻煩Yk你唔好打咁金。」Y仁都算係咁，咁短時間有佢咁多資料，一定知道我總有一日會插手，所以一早準備定，果然夠兄弟，「得啦，遲下請你食飯，係咁先！」cut左線之後，我就去左呢條二世祖既屋企樓下，到步之後，搵左個冇咁顯眼既地方坐底，等呢個二世祖既出現。

由中午一點，一直等到晚黑八點，正當我諗住走去買個飯黎食既時候，我見到Y仁所為既二世祖，我的媽啊，一面面油，身形又勁大份，起碼四十既腰啦，個樣又成隻豬咁，我的娘丫，Jessica睇中佢乜鬼野丫。突然間，我發現呢個死肥仔旁邊，有條好鬼索既女，點講好呢，就好似Jessica咁上下，但睇睇下，發現根本就係Jessica黎。

我見到個死肥仔係咁摸Jessica既手仔，作為男人既我，點認得到自己條女比人摸丫，呢個時候，我已經忘記自己同Jessica散左，我把鬼火，跑到個肥仔前面，諗住一拳打落去佢塊面既時候，突然聽到Jessica講左句「你試下打落去，睇下後果係點！」我聽完呢句，好自然咁回左句「但個死肥仔抽你水破，點計先？」我已經忘記曬自己同Jessica分開既事，Jessica聽完之後只係向到冷笑。

# 一切都係自討苦吃

「請問我既事同你有關咩？而且你係我邊個，你邊到有資格管我啲野丫？你估你係我邊個丫？唔該你唔好再出現係我既生活之中，由你同我分開既果一刻，我就當你死左，你知唔知頭幾日我日日以淚洗面丫？你知唔知我個心有幾痛丫？點解你要咁做丫？點解丫點解.....嗚.....」，結果同以前一樣，一講到好激動就開始喊。

其實諗真一層，事情根本唔會發生成咁，一切都係我一手做造，或者咁講，如果唔係我自己諗埋一邊，呢一刻，陪住Jessica身邊既應該係我，「你咪理我係你邊個，總之我唔准你同呢個死肥仔一樣，拿，肥仔，醒目既就自己走，咪逼我出手。」我指住個肥仔講，個肥仔搖左一搖佢身上既肉，之後好串咁講，「邊個丫你？咁同我講野，你係咪想死丫你？Jessica，我地咪理佢，我地走啦，上我到食飯，我煮比你食。」仆你，望住個肥仔一面淫笑咁講野，我真係好想一拳打落佢到，「肥仔，你咪咁串，Jessica咪聽佢講，唔好上去，一睇條友個樣咁淫，一定唔係個好人啦，我唔准你上丫！」我好激動咁捉住Jessica咁講。

Jessica只係講左句「用你既行動黎打動我，令我原諒你，我就聽你講。」

## 面對自己最討厭既野

「咁行動先可以打動到你丫？你講得出，我一定做得到，只要你唔好跟個死肥仔上去屋企，咁就乜都得。」我為左唔要Jessica跟個肥仔番去，我決定答應佢一切要求，反正我相信，冇野難到我既。Jessica呢個時候，只係冷笑左一下，之後就講，「你冇可能做到嫁啦，唔洗抱咁大期望，因為呢弱野係你最弱既。」，有咩係我最弱既呢？平衡力？冇理由丫，板都踩得唔錯，平均應該唔會差得去邊，唔通係.....「你唔係想我做完成果樣丫哇？真係好大難道啲」，我好緊張咁問Jessica，Jessica依然都係冷笑住咁答我「冇錯就係呢樣，如果你完成唔到，呢一世我都唔會原諒你。」我要完成既，就係我由細到大都唔合格過既平均分，由小一開始，我都係差一兩分合格，可以順利畢業，都係多得我拎得多獎項，所以先比我畢業，但中學開始，我就一直要靠試升黎升班，但今年，呢間學校冇左試升呢樣野，而且我係最後一年，如果平均分唔達標，只可以修業收場。我知Jessica咁做係希望我可以順順利利，而且我自己都好想，最大既重點係，我一啲都唔想Jessica跟個肥仔上屋企，我諗左一諗，決定好啦，「冇問題，講得出，做得到！」

## 期限為黎近呢次考試

「如果黎緊既呢次考試，你既平均分係唔合格，要修業既話，你唔洗指意我會再理你，會再同你有任何關係，呢段期間，你可以係whatsapp搵我傾計，但唔准約我出去，o唔ok？」Jessica最終都肯比個機會我，最少我仲有機會同番佢一齊，自己推走佢，就要靠自己拉佢番黎。

「ok，但你呢段時間都唔可以同佢有聯絡，你做唔做得到？」咁易比佢食住咩我，點都提出啲意見啦，唔知點解，Jessica聽完竟然奸笑，笑住咁講，「冇問題丫，就咁話啦。」聽完呢個答覆，我就跑番去開始我既溫書大計，但如果我肯留多陣，我應該會更加了解點解Jessica會同個肥仔一齊。「Jessica，你真係唔上黎食我煮既野丫？好好味嫁啲！」，「唔啦表哥，你都睇到佢幾緊張啦，點知會唔會搵個位偷睇緊我地，如果比佢見到我呢頭答應佢，轉頭又跟你上去，佢實唔開心死啦，所以都係咪啦。」「好啦好啦，唔逼你啦，自己番去小心啲啦。」肥仔講完就入左去大廈，Jessica轉身走，準備過馬路既時候，比人從後拍左一拍，佢用一種不出佢所料黎語氣問果個人「放心曬吓哇？我有跟佢上去，你開心啦？」「冇話開唔開心既，只係放心曬姐。」原本我真係跑走左，不過跑到一半，就醒起，如果Jessica跟佢上去咪仆街，所以我跑番去，搵個位偷睇佢地，番到去見佢地咁岩傾完，而且Jessica由一個人走左，由於擔心佢人生安全，所以決定送佢番去。

## 女孩一生，總會愛錯幾個人

「我送你番去得唔得？」費時比佢話，所以問問安全啲，Jessica望都冇望我就話ok。我地就咁樣一直行一直行，可能佢見我咁耐都唔出聲，最後都忍唔住問我「你唔會就咁打算一直陪我行番去，唔出聲丫哇？」，我聽完之後，將我組織好既問題問佢，「其實你覺唔覺得，我好麻煩，而且又仆街？」，問完我都好奇佢會點答。

「點解你問？發生左咩事？」Jessica見我咁怪，所以問下我。「冇，我岩岩係到諗，明明我已經決定左同你分開，但又因為你同異性有接觸，因而插手你既事，所以我先會咁問你。」講完呢番說話，我同佢都靜左陣，之後佢唉左聲，然後反問我「你覺得女人既一生係點？」我諗左陣，之後慢慢咁講比佢聽。

「女人既一生，味懂事之前，會一直受到父母或身邊既人既照顧，懂事開始，因為受到外界既影響，會慢慢同異性有接觸，慢慢就會開始有感覺，之後就走埋一齊，初初開始，會好想呢段感情係天長地久，唔會分手，但分左手之後，又會係到幻想下一個會點，重重覆覆，重重覆覆咁，直到遇到真正既Mr

.right，但當開始拍拖由熱戀期，變為平淡期，女人又會開始諗，係唔係呢個男人已經唔再愛我，點解佢好似變左咁。其實，大家都冇變，只係更接近更真實既對方，如果可以捱得到呢段時間，先夠資格講結婚。女人一生，總會愛上幾個仆街，但最終，都會愛上佢既Mr.right。」

講完呢番說話，岩岩好都到左Jessica屋企樓下，我見時間都唔早，所以我講完再見，就番左屋企溫書。而Jessica只係企向屋企樓下，望住我慢慢咁走遠。

# 為了愛

電視劇成日演到人，只要哄下個女仔，之後就可以同番個女仔一齊。但現實生活，又點會咁容易㗎。我自從答應左Jessica之後，每日基本上都係向書本間渡過，做唔完既練習，溫唔完既書，學唔完既知識，到底人既一生，應該追求咩野，而應該且利用咩方法去追求。

我追求愛，追求Jessica對我既愛，我唔知道追求到佢既時候，佢個心仲會唔會係屬於我，但我知道，如果我唔去嘗試追求番佢，我一定會後悔，所以哪怕接下落黎會幾辛苦，我都要支持落去。今日應該係我溫書大計開始既第二十一日，直至今日，我完成既練習加埋應該有半米高，可惜依然冇把握合格，但確實太叻，訓左係床到，無無聊聊打開手機，打開whatsapp，將我同Jessica以前既一切對話，由頭睇一次。

正當我睇到我地第一次見面之後既對話，Jessica突然搵我，「咁得閒上線㗎，做咩咁耐唔上線，又唔搵我，死左去邊黎？」，我係到諗，唔係我唔想搵你，而只係我根本冇時間搵你，「冇㗎，自從果日之後就日日都好鬼忙啦，日日係咁對住本書，訓教都冇離開過張枱，所以你睇下我幾忙㗎。」Jessica靜左一靜，之後問我「點解你要咁博命？你咁樣會捱壞身體。」我笑左一笑，「因為一切為左愛。」

# 白痴一名

「冇冇人話比你聽，你好傻？」Jessica覆得好快，睇完之後，我係到諗，呢生確實比好多人話過我傻，但全部都係因為我成績唔好，所以先會話既，但有幾多個係因為我既行為而話我傻呢？我諗得你，不知不覺間我訓著左。

當我醒番既時候，我發現手機有成三十幾個電話未接，而且仲發現有成百幾個whatsapp，重點係全部都係Jessica黎，我拿拿臨打開黎睇，開頭全部都係佢問我做咩冇啦啦唔回佢，係唔係真係傻左，但過左一陣，佢搵我既原因係因為佢好唔舒服，想我去買藥比佢，當我打算睇埋最後一條就去睇佢既時候，佢又再打黎，我拿拿臨接左佢，「喂，點丫，你有冇事丫，我以家過黎睇你啦，對唔住丫，我岩岩太劫訓著左丫。」「唔好講咁多廢話，你快啲黎，我好痛丫。」聽Jessica把聲好似就黎喊咁，我好快咁著埋3就冲出去，落左屋企樓下，上左架的士就去Jessica屋企，到左佢屋企門口，諗住拍門既時候，發現佢屋企個門打開左，我靜靜地咁推開個門，發現Jessica訓左係地下到，我跑過去，一手將佢一手攬起，不停咁拍佢塊面，「醒啦，Jessica丫，你做咩訓係到丫，你有冇事丫，喂丫，醒啦。」我不停講，不停搖佢，原以為佢會慢慢咁打開眼，點知佢笑左聲就醒左，之後講左句，「白痴，你終於黎啦。」



## 會有更好的

「你哋我？乜你覺得咁樣做好好玩咩？哋小陣我會死嫁吓？」我好嬲咁鬧Jessica，而佢竟然繼續保持微笑咁望住我，我心諗：小喇叭，比人話唔係應該唔開心既咩，點解佢仲會笑得出呢，一定有古怪。我好疑惑咁望住佢「你係到笑咩野？」

「我笑你明明仲中意我，但又要扮曬cool咁同我講分手，我笑你明明已經話要同我分手，但又每朝係我身邊出現，其實由你分手之後果朝係我屋企附近出現，我就知道你根本係到講大話，講一個連你自己都唔唔到你自已既大話，Yk，我問多你一次，你愛唔愛我？」Jessica講完呢番說話就靜左，而且我都靜埋，因為我唔明點解Jessica會發現到我既存在，而且點解佢會知道我係到講大話，「你點解會知道我係你屋企附近出現，照計你冇可能睇到我嫁啲？」我始終忍唔住問Jessica，但佢竟然用一種好強勢既眼神望住我，「你咪係到扯開話題，講，你到底愛唔愛我，你試下再扯開，你咪洗指意我再理你！」Jessica好惡咁望住我講，媽的，從未見過佢咁惡既，都係溫柔既佢好啲，「得得得，我答，我答，唔好扯嬲火，我認我係愛你，但有咩用，我保護唔到你，你又明唔明，如果我保護到你，你就唔會比人圍啦，我保護到你，就唔會令你咁擔心我啦，連愛既人都保護唔到，何來談愛丫？我之所以咁做，只係覺得如果我離開左，你會搵到個更好既姐。」

## 點諗有咩用？

「咁你以家點諗？係唔係仲覺得自己保護唔到我？」Jessica聽完我講之後，反問番我轉頭，「呢個問題已經唔重要，保護唔到你，我可以令自己變強，但如果比唔到幸福你，又點能愛你。」我講完之後，自己都唉左聲。「今次又點解咁諗丫？你又搞乜鬼，成日亂諗野，以前一齊果時又唔見你會咁？」對住以家我，Jessica只能感到無奈。

「因為以前一齊，我只需要去諗，每一日應該點哄你，應該點做你先會開心，如果果日比唔到開心你，我番到屋企真係會自我反省。」以家既我，愈講愈灰，簡直灰到一個點，「咁你覺得，我應該擁有點樣幸福？」Jessica講完呢句，就冇再出聲，我係身上摸左一摸，發覺冇煙，結果我只係去左廚房飲左杯水，就番左出去坐係Jessica身邊繼續講，「我覺得你應該擁有一個可以事事將你放係第一位既男人，因為咁既男人，先配得上咁寶貴既你，你係一個應該比人小心保護既公主，所以你應該搵一個可以保護到你既人，如果果個人連保護到你咁小事都做唔到，又點會保護到你，又點會比到幸福你。」講完之後，我只係望住Jessica，就冇再講咩野，到我走之前，Jessica只係講左一句野，「幸福唔係睇人既能力，係睇果個人既心。」

# 一日時間

「Yk，我要你追番我，我只係比一日時間你，如果呢一日你唔可以令我重拾當時心跳既感覺，我地就正式完。」Jessica講完之後，就靜靜地坐係沙發到。一日時間，決定生死，我應該點做？

「你比三個鐘時間我先，我想準備好一切就黎搵你，好冇？」我用一種好誠懇既眼神望住佢，等待佢既答覆，「好，希望你所做既準備既野會令我同番你一齊，其實之前叫你考好個試，只係想知道你有冇將我講既事放係心到，事實上你冇令我失望，所以希望今次都會係咁。我會係屋企等你，你搞掂就打比我啦，我就去搵你。」Jessica講完準備起身番床訓陣既時候，我捉住左佢，係佢背後攬住佢，我個咀貼緊佢耳邊，細細聲講「無論結果點，我都冇後悔過愛上你，我知道我錯得好離譜，將一切美好既事打破曬，但你相信我，我會用一生既時間去補償你，等我」講完之後我就走左。

落到街，其實我好迷惘，因為我唔知道應該去準備啲咩，當我係街到亂行左一陣既時候，咁岩係街到見到有一對準備結婚既新人，係大家祝福既目光下坐上去一架花車上面慢慢咁向佢地下一個目的地人進發。呢個情景，比左我一啲諗法，可能都係好多人做過既事黎，我行左附近一間花店，準備我要既野。

三個鐘後，我上左去Jessica屋企帶佢去目的地。目的地，就係大家都熟悉既石澳沙灘，冇計啦，近近地丫哇。去到目的地，已經係晚黑7點，「喂，帶我黎沙灘食風丫你？我好餓丫！！！」，女人果然唔餓得，一餓就會好易扯火，「一陣就會有得食嫁啦，你等下啦，就到嫁啦。」行多五分鐘到，到了，係Jessica眼前，係一個比4塊白色既布包住既地方，唔好以為咁簡單，好戲在後頭。

我拖住Jessica行入去，布既入面，係用玫瑰花既花瓣拼成既四個大既心心，而中間放住一張枱，枱上面，冇咩特別既只係放左兩塊牛排，牛排旁邊放住一支平平地既香檳，當我拉住Jessica坐係到既時候，同時係枱底拎出我一早準備好既36支玫瑰，一切都開始了，希望我會成功，為了愛，要努力

。

## 一日時間 (二)

「三十六支玫瑰既花語係我心屬於你，無論日後既日子係辛苦定係舒服，我都會將一切最好既野比你。」我將花交左係Jessica手上，我就自己坐底，開始食我準備既晚餐，當然中間都有小小驚喜啦。我將一隻一卡既鑽戒放左係塊牛排下邊，雖然唔係特別大，但訂個婚應該夠啦，無錯，我今晚係打算同Jessica求婚，雖然我知道我咁樣做係有啲早，不過，真心既野，邊會怕太早嫁。我一路食，一路望住Jessica慢慢咁切到去戒指既附近，我個心就一路跳得愈黎愈快。

當Jessica準備要最後一塊牛排，佢個叉慢慢放落去，我個心跳得愈黎愈勁，好似要跳出黎咁。「咩... ..咩咩」「喂喂，點解會咁嫁，你係下邊放左咩丫？」Jessica唔自己睇，反而問番我轉頭，唔通佢知道左啲咩？「自己睇囉，問我都唔話你知，嘻嘻.....」Jessica比我串左一串，就唔講野，自己慢慢咁拎開塊牛排，戒指都慢慢咁出現。

「點解會咁既？隻鑽戒你買既？如果係你買，就咁放係到咩意思先？」Jessica提出左佢既疑惑，而我就用我既行動解答佢，我拎住隻戒指，浪漫既音樂都同時上起，我單腳跪下，抬頭望住Jessica既眼睛，慢慢講出我既宣言。

## 一日時間 (三)

「冇，我只係想話比你知，我唔敢保證我可以比到童話般既生活比你，但係我會比一個幸福溫暖既家比你，我唔敢保證自己可以一夜長大，但最少我會為你而去成長，我會改變自己既缺點。我知道呢一刻唔應該講呢啲野，但如果唔講呢啲，我確實諗唔到應該講咩。Jessica，嫁比我得唔得？」

人既一生，唔係順境，就係逆境，而我自己行緊到底係咩境，連我自己都唔知道，但最少我知道，我既運氣，唔差得去邊，「雖然你講既說話冇一句感動到我，但我知道呢啲全部都係出至你真心既，想我講我願意呢三個字，好簡單，答應我一樣野。」又黎料，唔知要答應咩黎，「你講啦！」，Jessica既笑容出番黎啦，「唔好再諗住離開我，如果唔係我了解你，知道你既為人係點，可能我真係會死心，之後離開你。不過好在我清楚你係一個醋王，我一同男仔玩得埋你就會吃醋，所以我先至可以搵人試到你姐。」咩話，我比Jessica陰左，到底邊個係幫兇呢，「請問邊位大人物咁得閒幫你手黎試我丫，講黎聽聽。」媽的，最憎比人陰，既然唔打得Jessica，咁就打個幫兇，哼哼。「個大人物你見過啦，咪係我表哥囉，上次你要郁手打果個丫。」 what the fuck!

## 重新開始

「我答應你，我唔再離開你，我會一直守係你身邊。」我伸出雙手攬住佢，係佢面上吻左一下，Jessica只係對住我笑，「我地重新開始啦。」事情總算有個完滿既結束，而我都考完個試，可惜結果都係修業收場，我原以為Jessica會離開我，但佢不但冇離開我，反而安慰番我轉頭，為左Jessica，我重新面對將會考既dse，人生既一大考試。

好多人都會比呢個試搞到痴曬線，當然我都唔例外，為左呢個試，我小左同Jessica見面，基本上日日係屋企同書本打大仗，日打夜打，為左自己既前途，只能夠咁crazy。距離考試仲有兩個星期，因為感到壓力太大，所以空出一日比自己休息下，「喂，今日我地去長洲行下啦，好冇丫？」最好既休息緊係見女朋友啦，「好丫，咁一個鐘之後你黎接我啦，拜拜。」cut左線之後，我要沖個涼先敢出去，因為閉關閉左幾日，所以冇沖涼，以家成身發曬臭，唔沖又點敢出呢。

一個鐘之後，我准時出現係Jessica屋企樓下，等左一陣，Jessica就出現，唔知係唔係太耐冇見佢，我發覺Jessica又好似變靚左

咁，而且身材愈黎愈好，媽的，呢排冇見佢到底做過咩黎呢，「你變靚左，搞到我差啲認唔出你添，哈哈……」「口花花啦你，行啦死佬」Jessica笑左一笑就行去巴士站，而我就跟住佢後面。

今日Dse放榜，無論結果係好，定係唔好，總之大家要記住，路係人行出黎，大學可能係社會既入左券，但並唔係為一既出路，出路多的事，最緊要係隨住個心去做事，咁樣人先會開心。

## 長洲之遊

如果話香港有咩地方岩年青人去既話，咁就應該係長洲嫁啦。點解？老實講，我覺得長洲好，由先係因為遠離市區先啦，二黎入邊啲都幾平下，三黎空氣又唔錯，所以我覺得真係幾岩年青人去。係間船到搖下搖下，搖左一個鐘先入到去，搖左咁耐，見劦劦地就問下 Jessica，「要唔要book間房休息下先丫，今日反正入得黎，就盡情咁玩啦。」Jessica望住我奸笑左一下，就問我「你唔會係諗埋曬啲衰野丫哇，係既話我唔制嫁。」我的媽丫，我似咁既人咩，「你諗多左啦，我只係想休息下，點丫，要唔要book丫？」「book啦，反正我都劦。」

如果大家有去過長洲，應該知道碼頭對出有個租房既地方嫁啦，咁我就行過去啦，「唔該，要一間最平既房，即日既，唔過夜。」個老闆娘望一望我，再望下Jessica，之後笑左一笑，我發誓，一定係淫笑黎嫁。「二百蚊啦，一陣再比多一百蚊個人拎鎖匙，交匙會比番你，地址係到。」「唔該曬。」一心諗住去休息下，點知中左伏。

搵左半個鐘，搵到個地方，點知抬頭一望，



原來係黎左東提，仆街，中伏。「你介唔介意  
丫，如果驚可以搵果間。」「算啦，反正用黎  
休息下姐。」

## 長洲之遊（二）

於是我地兩個就膽粗粗咁行左入去間房，比我想像既差唔多，二百蚊既價係咁上下啦，提醒大家，如果要過夜真係唔好搵東提果邊，因為環境真係幾差下。講番正題，我地入到去，開曬屋入邊既野，之後過左陣先關門，冇計啦，費事一屋唔知咩味啦。兩個人由於太叻，基本上訓係床到一陣就訓著左，醒番都已經係兩點既事，兩條友對住塊鏡，執下個人樣，我係男，當然比佢呢啲女既快執完啦，手快快執完又冇野做，於是就對Jessica手多多啦，而且見佢冇反抗，咁就緊係繼續進攻嫁啦，點知Jessica突然轉個頭望住我，之後望到實一實咁講「唔好要我對你失望，唔好忘記你話只係黎休息下炸，再手多多既話，唔洗指意下次我會陪你。」

比佢咁講一講，自己都醒水，冇再繼續，走左出去食下煙，無幾耐Jessica就出左黎，之後就講左句，「行得」，講完就佢由佢行，而我就係後邊跟住，我地不斷行，就不斷食，基本上真係行到邊，就食到行，到最後真係叻到唔想行，就諗住搵個位坐係到休息下。但點知，係呢個時間突然有架單車刹出黎，差五秒

到就撞到Jessica，我大叫「小心」，而隻右手同時伸出去捉住佢，將佢一下扯黎我懷抱到，一手將攬住，令一隻就護住佢個頭，而架單車係我背後擦過，搞到我背脊勁痛，正當我諗住跑上去追個飄車黨既時候，背後突然傳黎一聲「哎呀」。

我向後望左一望，發現Jessica坐左係到，而隻左手不停咁摸左腳既腳眼，我單腳跪底，係佢腳眼位摸左幾下，發覺有啲腫，唔洗問啦，一定係扭親啦。「做咩整親都唔講出聲丫，係唔係岩岩比我扯左埋黎果時整親嫁？仲行唔行到丫？」Jessica冇出到聲，只係不停咁摸個腳眼，跟住無幾耐就開始喊，愈喊仲愈大聲，「喂喂喂，當我拜下你啦，你唔好喊啦，我地以家番去啦好冇？」，「走開丫你，做咩咁大力扯人地丫，好痛丫，叫我點行丫？」

原來女仔整親都幾唔講道理，話曬救佢一命破，算啦，搞掂左佢先仲好，我企左起身，雙手將佢抱起，就咁靜靜地係日落既底下行番去房到，而佢中途就訓著左，可想而知佢幾劫。

## 長洲之遊 (三) 完結篇

送左Jessica番房之後，我諗左一諗，  
Jessica傷左都唔係點行得，不如過一夜晚，  
天日再番出去都味遲啦，我出左去，同租房個  
人講改天日先出去，之後就去左買啲野食番去  
同Jessica食飯。味入房門就聽到Jessica喊，  
我以為發生咩事，就拿拿聲開門去睇，  
Jessica一見到我入黎，就跳上黎我身上，攬  
住我，之後不停咁講，「點解你要留底我一個  
人丫，點解你肯都要同我分手丫？你係唔係鐘  
意左第二個人丫？講丫！」  
呃，發生咩事丫，我幾時有鐘意左其他女  
丫，「等陣先，你講緊咩丫，我幾時有鐘意左  
其他人丫，仲有，你做咩事冇啦啦喊丫，發生  
咩事丫？」「你岩先係夢到又同我分手丫，點  
解你要同我分手丫，係唔係我有咩做得唔夠好  
丫，你講啦，係我改啦，只要你唔離開我，我  
咩都肯改嫁。」原來係發夢。  
「你冷靜啲先啦，我唔會同你分開嫁，我對  
你係點，你應該知道嫁，你冇野要改，你只係  
要做番你自己，咁樣你先會開心。」我為呢個  
喊包抹眼淚，之後野都味食就一齊訓左，半夜  
我突然比啲聲嚇醒左，之後我落左床，不停搵

到底係邊到發出聲音，我行出房門，發現有個  
女仔坐係街到喊。我行左落樓，比左張紙巾個  
女仔，之後陪佢坐左下，「Hi,我叫Yk,點稱  
呼你?」「我叫Y寶。」，我望一望呢個Y  
寶，最多都係十五，十六歲到，點解夜咁晚  
唔番屋企，係街到呢，「Y寶，做咩咁夜唔番  
屋企，坐係到喊Y?等我估下先，唔通係失  
戀?」「你點知嫁?我同個拍左三個月既男朋  
友散左Y,我好愛佢嫁，點解佢要離開我Y!嗚.....」

「你唔好喊住先，聽我講個故仔，你聽完話  
我知有咩感覺，好冇?」「好，你講啦。」

「從前有個男仔，佢都係好似你呢個年紀咁，  
愛一個人，愛到死去活來，但最後佢都係比人  
飛左，過住啲煙酒不離口既日子，後黎天上安  
排左一個天使係個男仔既身邊，而個男仔慢慢  
都脫離個煙酒既生活，過番啲健康既生活，而  
且仲同天使一齊左添。」Y寶冇左喊，反而主  
動同我講野，「你係想話我知道，你只要有珍  
惜過呢個人，唔好介意個結果係點，岩唔  
岩?」我笑左一笑，「我只係想話你知，如果  
真係愛你既人，無論你點打，點趕佢走都好，  
佢都唔會離開你既身邊，記住，眼淚係應該為  
值得既人而喊，而唔係為啲花心既人，終有一  
日，幸福會降臨係你身上。」Y寶聽完，靜左

一靜，之後問我，「咁你既幸福出現左未？」  
我望住個房門，「我既幸福，係我岩岩分手，  
傷心既時候就出現左，我地經歷左好多野，最  
後都可以係埋一齊，所以我相信你都會搵到你  
既幸福。」

呢個時候，樓上傳黎Jessica既聲音「丫  
k，你死左去邊丫！！」我企左起身，拍一拍  
身上既土，之後就走去搵我既寶貝。